

Cler e net cunter la lescha turistica

Partida liberaldemocratica dal Grischun

DA GION NUTEGN STGIER / ANR

■ **Ina rotscha delegadas e delegads da la Partida liberaldemocratica dal Grischun èn stads preschents tar la radunanza da mesemna saira a Tusaun. Refusà han els la lescha chantunala davart las taxas turisticas. Giast è sta Philipp Müller, il president svizzer dals liberals.**

Darar è l'interess per ina radunanza da delegadas e delegads da la pld grischuna stà uschè grond. Radund 90 dunnas ed umens èn stads da la partida e numerus giasts. In da quels era *Philipp Müller*, dapi l'avrigl 2012 president naziunal da la pld. Stads a la radunanza da delegadas e delegads èn er cusseglier dals chantuns *Martin Schmid* e cusseglier guvernativ *Christian Rathgeb*. Philipp Müller ha ditg als preschents che la pld duaia en l'avvenir derasar ses optimissem liberal e restar autentica. Prendì posiziun ha el er tar la consultaziun da la pld svizra tar ils gieus olimpics en noss chantun che haja procurà per intginas confusiuns. Philipp Müller ha accentuà che la pld saja betg cunter l'olimpiada e tuttina sajan intginas dumondas betg anc respundidas. En il parlament naziunal vegnia quel project examinà bain e critic e suentar decidì. I saja tuttina in project dad ina milliarda francs, ha ditg il president naziunal da la pld. Er quai che pertutga la cumpra dals aviuns «Gripen» spetga la pld anc sin diversas respostas dal Departement federal da defensiun, ha concludì Philipp Müller ses referat.

65 vuschs cunter 23 vuschs
Già da decider han ils preschents er las parolas per la votaziun federala e la votaziun chantunala dals 25 da november 2012. Senza discussiuns ha la pld decidì da sustegnair la midada da la lescha davart epidemias d'animals e quai unanim cun 93 vuschs. Per bler dapli material da discussiun ha lura procurà la lescha chantunala davart las taxas turisticas «LTT». Per quella ha referì deputà *Marcus Caduff*, (pcd) Morissen e cunter quel-

la deputà e schef da la fracziun da la pld grischuna *Rudolf Kunz*, Cuir. El ha ditg che la lescha saja memia cumplitgada, senza effect, centralistica e malgista. Ultra da quai vegnan pervia da quella betg daplis giasts en noss chantun, ha accentuà Rudolf Kunz. La lescha chantunala davart las taxas turisticas «LTT» saja er anticonstituiziunala e cunterfetschia a l'autonomia da las vischnancas. Marcus Caduff dentant ha ditg che quella lescha portia dapli trasparenza e gistadad. Ul-

tra da quai svaneschan entras quella er ils profitunzs, ditg quels che pagan nagina taxa tursitica, ha menziunà il deputà lumnezian. Cun ina excepziun èn suentar ils dus referents per e cunter la lescha chantunala davart las taxas turisticas «LTT» s'exprimids divers exponents cunter quella. Pli u main ins dastga dir che las opiniuns eran già fatgas. Quai conferma er il resultat da 65 vuschs cunter 23 vuschs tar quatter abstenziuns, cunter la uschenunada «LTT».



Quatter exponents da la Pld. Ils Liberals: Christian Rathgeb, cusseglier guvernativ; Philipp Müller, president da la pld svizra; Michael Pfäffli, president da la pld grischuna e Martin Schmid, cusseglier dals chantuns (da san.).